

Tico Croes ta cuestiona retiro di Escalona PAKIKO A RETIRA ESCALONA Y NO COMISARIONAN DI TELE ARUBA? Insinuacionnan di Elio Nicolaas encuanto irregularidad mester worde splica



ORANJESTAD (AAN): Den un serie di pregunta e miembro di Parlamento pa AVP Tico Croes a cuestiona e retiro di Boy Escalona como Presidente Comisario di Setar. El a puntra pakico Escalona a haya retiro mientras e Comisarionan di Tele Aruba a keda na nan puesto.

Tico Croes a referi na loke a aparece den medionan di comunicacion encuanto e hecho cu Boy Escalona y Dan Oduber a keda retira como Presidente Comisario y Comisario di Setar respectivamente. Nan no a bolbe worde nombra contrario na loke a pasa cu tur e otro miembronan di e Hunta di Comisarionan.

Tico Croes a pidi Ministro di Asuntonan General pa confirma e informenan aki na Staten y indica den ki forma y ki dia a comunica na e dos personanan aki cu nan lo no worde renombra.

Si e informenan por worde confirma Tico Croes kier pa Staten haya sa e motibonan pa cual Gobierno a tuma su decision. Tambe e

kier pa e Ministro di Asuntonan General confirma e insinuacion di Ministro di Trafico y Comunicacion cu lo tabata tin irregularidad den e caso di groundstation.

E kier haya sa na kico e Ministro ta referi exactamente y kende lo tabata envolvi den e irregularidadnan aki.

Tico Croes a puntra: "Señor Ministro por a informa Parlamento cu si enfrente di e insinuacion tocante e medida contra señores Escalona y Oduber y teniendo cuenta tambe cu e informacion suministra na medionan di comunicacion di parti di Ministro di Trafico y Comunicacion ya a laga haci investigacion di accountant y si Parlamento por haya copia di tal rapport?"

Si esaki no ta e caso ainda Tico Croes ta haya cu Staten mester worde informa a base di kico a tuma un medida drastico asina y na un forma asina abrupto contra Escalona y Oduber mientras cu di otro banda a laga e Hunta di Comisarionan di Tele Aruba manera e ta.

Tico Croes ta laga sali dilanti den su preguntanan cu e medida contra Escalona y Oduber ta hopi pisa si compara loke ta pasa na Tele Aruba caminda a pesar di tur acusacion den direccion di Tele Aruba; no a retira e miembronan di e hunta di com-

isario mientras e hunta te hasta a perde su caso den Corte den cual el a pidi rec-tificacion.

Finalmente Tico Croes kier worde informa con por ta posible - teniendo cuenta cu tur e escandalonan con-

tinuo entorno Tele Aruba - cu awor ta haci un comisario di Tele Aruba Presidente di Hunta di Comisario.